



## L'an 2119 in terra rumauntscha

Ahhh d'he eau durmieu bain. Che sömme curius! Tuot la glied chi chamina intuorn cun üna culauna d'or e discuorra. Che vulaiv eau fer her? A schi, precis eau vulaiv ir a piglier illa remisa la s-chantschia per mieus vstieus. L'otra es memma pitschna, ma il prüm am tiri aint e zieva cumandi a mieu roboter *Nirulf* da'm güder. Inua d'he eau be miss mieus vstieus? Ah, lo! Grazcha a mieu *Nirulf* fidel. Svelt programer e *Nirulf* as metta già in viedi. E mias s-charpas? Ma naaa. Eau d'he lascho sur not las s-charpas sün terrassa. Puhh sun quellas fraidas! Eau stögl fer prescha. *Nirulf* schaschina già culla s-chantschia. Be cha'l nu'm rumpa qualchosa... Ma che desaster! Che plunder cha vain our da quista s-chantschia. Quista puolvra am fo bod stendscher. Da quels problems nun ho mieu cumpagn. Auncha quistas trais robas. Eau las pigl e las met vi lo. Uossa pudainsa ir. Plaunet essans tar nossa chesa. Auncha sü da s-chela ed a schnestra ed aint in mia chambra. E già è'l cò cun ün sdratsch! Che flot. *Nirulf* cunagia cun üna sveltezza incredibla. Mia s-chantschia glüscha scu or. Ma cu as evra quista s-chantschia? Ah, uschè. Che es quist? Cudeschs e chartas! Intaunt cha mieu roboter cunagia eir dadainsvart contaimpli pü precis quist s-chazi. Cudeschs antics. Che udurina penetranta. Eau met üna vouta da la vart quist plic e vegn a giuver. Mieu cumpagn vegn eir. Mieus amihs sun sün piazza. Uossa è'la mia, la balla! Mieus impissamaints vaun pella ramma. Quist'udur es aunch'adün in mieu nes. Dischagreabel. *Nirulf* vo vers chesa. Perche nu spetta'l sün me? Eau cuor zieva fin in staunza. Tuot es in bel uorden. Inua sun ils cudeschs? Cha'l dianzer! E las chartas. Scu ch'eau cugnuosch a mamma ho'la bütto tuot tal palperi vegl. Eau stögl salver quella roba. Grazcha a *Nirulf*. Eau stögl fer prescha aunz cha'l camiun dal rüt vain e vo cun tuot. Che merda. Eau stögl saglir giò in quella foura dal molloc. La savurina es darcho cò. Schilafè! Mieus cudeschs e las chartas. Darcho üna vouta gieu furtüna. Il camiun! Naaa! Che dessi be fer chi am güda uossa sü? Vè a güder a me *Nirulf*! Perche am insömgi uschè qualchosa? U es que listess

capito? Eau nu se. La savur es darcho cò. Perche d'he eau quista charta in maun? Uossa se eau. Quist cò es propi capito! 2019. Che interessanta scrittüra. Eau evr üna vouta quista charta: A la giuventüna. Tgnè chüra da nos rumauntsch in vschinauncha! Nu laschè tiers l'influenza dal tudas-ch e l'inglais. *Flurin*. Mieu tat! Eau incleg. Que es mia lezcha! *Nirulf, fluriN* que rabagliainsa a fin! Eau vögl deraser nos rumauntsch sün tuot il muond. Geneticamaing stu que bain esser cha la lingua es programeda eir in oters tscharvels. Eau incleg eir che cha'd es scrit. Cu rajiundscher cha la glied so ler, incler e discuorrer rumauntsch eir dal 2119? *Nirulf*, güda'm! Nus stuvains programer la lingua. Cu dessi be fer que? Forsa pudessi fer üna culauna u uragliers. Eau fatsch üna culauna. Vè *Nirulf*, cumanzainsa a programer üna bella culauna! Dad or stu'la esser. La glied crouda aint. Schi, que fainsa! Ah *Nirulf* tü hest già vi dal programer! Bun, que rivainsa. Ma cu vendi alura quistas culaunas? Que gurdainsa alura auncha. Üna buna reclama e tuot chi cuorra. Il predsch nu po esser memm'ot! Est tü già a fin? Bunischem! Damaun es la culauna sül marchò ed eau sun persvas cha our da las buochas da la glied s'oda be pü rumauntsch.

**Flurin Thoma, avrigl 2019**